

«La lavur parlamentara para ozendi pli hectica»

Inscunter d'anteriuras presidentas e presidents dal cussegl grond

■ (anr/fa) Per la dudeschavla giada s'ha scuntrada a Cuira ina ventgina da las deputadas e dals deputads che han presidià il parlament grischun. Quests inscunters organischescha l'uniun mintga dus onns. L'iniziativa d'organisar da quests inscunters dals anteriurs presidents dal cussegl grond ha gì avant 24 onns *Christian Joos*. Da quel temp era'l landamma e deputà al parlament grischun. El era da l'avis che tuttas quellas e quels che han presidià il cussegl grond duessian sa reunir almain mintga dus onns. Suenter avair fundà l'Uniun da las anteriuras ed anteriurs presidents dal cussegl grond ha'l presidià quest'organiziun divers onns. Ses successur è stà alura *Marx Heinz* da Tusaun ed avant quatter onns ha surprindì *Not Carl* da Scuol il presidi da quest'uniun. El aveva presidià il parlament grischun l'onn 1994/95 per la pps da quel temp dal circol Suot Tasna.

Gentar cuminaivel ensemen cun la regenza

Al 12avel inscunter venderdi passà ha prendì part ina ventgina da commembras e commembers da l'uniun. La damaun s'han els chattads per in emprim caffè da cumpagnia e per udir co ch'i giaja cun l'in e co cun l'autra. Alura han els observà ina pezza las tractativas dal parlament actual. Suenter la fotografia da tuts ensemen cun il nov president dal cussegl grond *Duri Campell*, il cusseglier governativ *Christian Rathgeb* ed il salter chantunal *Julius Maissen* s'han els mess en viadi per il gentar cuminaivel. «Quel avain nus giudi quest onn en l'ustaria Va



Las anteriuras presidentas ed ils presidents dal cussegl grond s'han scuntrads venderdi a Cuira e fatg la visita al parlament actual.

FOTO F. ANDRY

Bene», ha ditg *Not Carl* e menziunà che la chanzlia chantunala haja gidà sco adina ad organisar l'inscunter. Al gentar cuminaivel offrì dal cussegl grond han prendì part era la regenza, ils presidents da las fracziuns ed il chancelier *Claudio Riesen*. Per l'embelliment musical ha procurà *Not Carl* ensemen cun ils dus deputads e sunatibas *Andy Kollegger* (pbd, Cuira) e *Mario Salis* (pps, Engiadin'Ota) sco era cun *Hanspeter Danuser* e *Hans Rudolf Strahm* da Samedan.

«Damain temp per discussiunar tranter pèr»

Sche *Not Carl* guarda tge che saja midà tar la lavur parlamentara ha'l impresiun ch'i saja daventà pli hectic en quest parlament. «Quai è però en general il cas, uschia er en il cussegl grond, e quai am para in zic donn», di el. In motiv è tenor *Carl* che las sessiuns èn pli curtas che pli baud.

Cur ch'el aveva cumenzà l'onn 1978 duravan las sessiuns in'emna. «Ins aveva

dapli temp per vegnir ensemen la saira e discussiunar suror ils cunfins da la partida.»

La conseguenza da quai è, sco ch'el di, che la politica da las partidas saja daventada pli impurtanta: «Gia dis ordavant furman quellas las opiniuns e tegan alura fermamain vi da quellas, a deputadas e deputads cun auters avis na gartegia alura – era cun ils megliers arguments betg – da midar quels parais», manegia *Not Carl*.